



UNIVERSITÄTS-
BIBLIOTHEK
PADERBORN

Universitätsbibliothek Paderborn

Joannis Commirii E Societate Jesu Carminum Libri Tres

Commire, Jean

Lutetiæ Parisiorum, 1678

Christo Jesu In Eucharistia De Cordibus Triumphanti. Epinicivm.

urn:nbn:de:hbz:466:1-14818

Fornicibus longis, perque intima trames apertus
Viscera petrarum, & cœci penetralia Ditis.

Huc adde egregias cultu, spoliisque superbas
Pyramidas populorum, auctosque insignibus arcus,
Balneaque, & thermas, & vulgi gaudia circos,
Et vota in medio belli discrimine templa.
Hæc & plura suo spectanda volumine Pastor
Exhibuit, nullis ante intellecta priorum;
Et quamquam tritos Latii describere calles
Aggressus, tamen astra novo sibi limite pandit.

CHRISTO JESU

IN EUCHARISTIA

DE CORDIBUS TRIUMPHANTI.

EPINICIVM.

STERNITE fronde vias & pictis compita velis,
Spargite ferta manu, date tura, incendite odores:
Purpureâ passim florentes luce fenestræ
Luxurient, vincantque suis funalia solem
Ignibus. In cantus & verba precantia voces
Effundant liquidas pueri innuptæque puellæ
Certatim, festi resonent toto æthere plausus:
Victor adest Deus, Ecce Deus. Non qualis opacâ
Nube vehens olim Zephyros per inane jugales
Cum tonitru ciet, & tristes denuntiat iras
Gentibus, inque reos cœlo gravis ingruit ultor:
Sed felix placidusque suis, & dignus amari
Ingreditur famulas populis lætantibus urbes,
His secum referens pacalis munus olivæ.

P ij

O victor! (nam quo potius te nomine dicam
 Magne triumphati sine vi, sine milite, mundi
 Arbiter ac princeps?) gravibus non pressa catenis
 Post currus it turba tuos, lacrymosaque reges
 Agmina felicitis turbant spectacula pompæ;
 Non tibi captivæ dejectis mœnibus arces
 Invidiam, non regnorum fumantia busta
 Conciliant, tinguntque tuas fuligine palmas.
 Sed Pietas comes, & miti Clementia vultu,
 Atque Fides, atque in dubiis certæ anchora rebus
 Spes, circum duxere choros. Tibi prævia latè
 Gratia iter sternit, manibus cœlestia plenis
 Dona ferens, totasque in vulgus prodiga spargens
 Divitias: tibi certatim plaudentibus alis
 Siderei alludunt juvenes: te regia cœli
 Ambit, victorique humeros supponere gaudet.

Præcipuas sedenim reliquis cedentibus ultrò
 Implet Amor partes, magni pars ipse triumphi
 Maxima. Non illo quidquam præfente, severi
 Majestas habet, aut tumidi victoria fastus.

Quin adeò metuens ne non tolerabile numen
 Mortales hebetet visus; refringit amicæ
 Oppositu nubis radios, orisque serenat
 Fulgura, quò fas sit cunctis impune videri,
 Et solos retinet queis pectora torreat ignes.

Nec vero his Amor officiis contentus; inermem
 Christe, manum reddit tibi, ne punire nocentes
 Ut cupias, possis: adimit quoque luminis usum
 Crimina ne videas: aures tibi denique claudit,
 Ne pateant jactis ultura in numina probris.

Sic te sponte adigis sub vincula: quique triumphas,
 Ipse triumpharis proprio subiectus amori.

O animæ turres, & claustra impervia ferro,
 Ne pudeat portis, nunc demum ivisse reclusis
 Sub leges, ipsâque viam fecisse ruinâ.
 Tuque meum pectus, quamquam munimine circum
 Obseptum triplici, superesque adamanta rigore,
 Cede Deo, totoque sinu complectere ovantem.
 Hoc petit, hæc illi est tantorum meta laborum.
 Æternosque feret clemens tibi victor honores.

C O R

IN AMORIS OFFICINA RENOVATUM.

A D D E fidem vati, pronasque his vocibus aures
 Posteritas, memorique animo mea dicta reponere:
 Mira canam. Piceis nox orbem involverat alis,
 Jamque poli media cursum statione tenebat:
 Cum subito visa ante oculos discedere late
 Culmina, & immissa compleri luce penates.
 Quaque secans umbras radiato limite sulcus
 Funditur, aurati faciens commercia mundi;
 Dius Amor magna fratrum comitante caterva
 Improvisus adest. Dependet eburnea collo
 Telorum custos: manus altera sustinet arcum:
 Altera præfixo vibrantem adamante sagittam.
 Et prior: O socii, quid enim mea jura moratur
 Accipere, & domino submittere pectus amanti?
 Nempe gerit triplex circa præcordia ferrum
 Durus, & à blando nequicquam figitur arcu:
 Fracta morâ cuspis, solidoque illisa resultat
 In nostrum reditura caput. Quin irrita quando
 Vis perit, & nullis rigor est superabilis armis,
 Ingenio certare juvat. Depromite cunctas